

მოსწავლეთა საბჭოს დებულება

მუხლი 1. ზოგადი დებულებები

1. მოსწავლეთა საბჭო არის სკოლის სტრუქტურული ერთეული, იგი არჩეული ორგანოა.
2. მოსწავლეთა საბჭო თავის უფლებამოსილებას ახორციელებს სასწავლო წლის განმავლობაში მოსწავლეთა საბჭოს ახალი არჩევნების ჩატარებამდე;
3. მოსწავლეთა საბჭო დაკომპლექტებულია სკოლის მოსწავლეებისაგან.
4. მოსწავლეთა საბჭო ვალდებულია, თავისი საქმიანობა წარმართოს ამ დებულების საფუძველზე.

მუხლი 2. მოსწავლეთა საბჭოს შემადგენლობა და მიზნები

1. მოსწავლეთა საბჭოს ძირითადი მიზანია სკოლის ფუნქციონირების, მისი განვითარების ხელშეწყობა, სასკოლო ცხოვრებაში მოსწავლეთა ჩართულობის გაზრდა, სკოლის მოსწავლეთა ინიციატივების მხარდაჭერა.
2. მოსწავლეთა საბჭოს წევრები არიან სკოლის V-VI კლასების, საბაზო და საშუალო საფეხურების მოსწავლეები, თითო კლასიდან თითო წარმომადგენელი.

მუხლი 3. მოსწავლეთა საბჭოს ძირითადი ამოცანები და ფუნქციები

1. მოსწავლეთა საბჭო თავისი უფლებამოსილების ფარგლებში იცავს და წარმოადგენს მოსწავლეების უფლებებს, მათ კანონიერ ინტერესებსა და ინიციატივებს.
2. მოსწავლეთა საბჭოს ძირითად ამოცანებს წარმოადგენს:
 - ა) მოსწავლის მიერ საკუთარი უფლება-მოვალეობების, ინტერესების გაცნობიერებაში ხელშეწყობა.
 - ბ) მოსწავლეების ინტერესების შესაბამისად სხვადასხვა საგანმანათლებლო აქტივობის ორგანიზება, მათი ჩართვა სკოლის მოსწავლეთა სხვადასხვა ღონისძიებაში და ა.შ.
 - გ) სკოლის მოსწავლეების გონებრივი და ფიზიკური უნარ-ჩვევების განვითარებაზე ზრუნვა, ცხოვრების ჯანსაღი წესის დამკვიდრება.
3. მოსწავლეთა საბჭო დასახული ამოცანების მისაღწევად ახორციელებს შემდეგ ფუნქციებს:
 - ა) მოსწავლეთა საბჭოს წევრთაგან იღებს და ამუშავებს ინფორმაციას მოსწავლეთა ინიციატივებთან და ინტერესებთან დაკავშირებით.
 - ბ) შეიმუშავებს და სკოლის ორგანიზატორთან თანამშრომლობით დირექტორს წარუდგენს მნიშვნელოვან მოსაზრებებს სასკოლო ცხოვრების სხვადასხვა საკითხთან დაკავშირებით;
 - გ) დირექტორის მხარდაჭერის შემთხვევაში, გეგმავს სკოლაში სხვადასხვა სახის საგანმანათლებლო, სასწავლო, სპორტულ/კულტურულ ღონისძიებებს, პროექტებს.
 - დ) საჭიროების შემთხვევაში, თანამშრომლობს სხვა საგანმანათლებლო, სასწავლო და სპორტულ/კულტურულ დაწესებულებებთან;

შპს მრავალდარგობრივი გიმნაზია იბერია

მუხლი 4. მოსწავლეთა საბჭოს დაფინანსების წყაროები:

1. მოსწავლეთა საბჭოს საქმიანობის დაფინანსების წყაროა სკოლის დირექციასთან შეთანხმებული ბიუჯეტი;

მუხლი 5. მოსწავლეთა საბჭოს წევრთა და საბჭოს მუშაობის კოორდინატორის არჩევის წესი

1.V-VI კლასებისა და საბაზო და საშუალო საფეხურების ყველა კლასის მოსწავლე საკუთარი კლასიდან ერთ წარმომადგენელს ირჩევენ მოსწავლეთა საბჭოში, ხმათა უმრავლესობით.

2.ერთნაირი ხმების მიღების შემთხვევაში ტარდება მეორე ტური.

3.თითოეულ კლასში არჩევნების შედეგები ფორმდება ოქმით.

4. მოსწავლეთა საბჭოს წევრები საკუთარი შემადგენლობიდან ხმის უმრავლესობით ირჩევენ მოსწავლეთა საბჭოს მუშაობის კოორდინატორს, საბჭოს წევრთა არჩევნების შედეგების გამოცხადებიდან 1 კვირის ვადაში.

5. ერთნაირი ხმების მიღების შემთხვევაში, უპირატესობა მიენიჭება უფრო მაღალი აკადემიური მოსწავლეთა მქონე კანდიდატს.

6.მოსწავლეთა საბჭოს წევრთა და საბჭოს მუშაობის კოორდინატორის არჩევნები ტარდება თანასწორობის საფუძველზე, ფარული კენჭისყრით, გამჭვირვალობის პრინციპების დაცვით.

7. მოსწავლეთა საბჭოს არჩევნებს და საბჭოს მუშაობას ხელმძღვანელობს სკოლის ორგანიზატორი.(უფლებამოსილია არჩევნების ჩატარების ორგანიზებაში ჩართოს სკოლის ხარისხის მართვის მენეჯერი)

8. მოსწავლეთა საბჭოს წევრთა და კოორდინატორის არჩევნები ტარდება სწავლის დაწყებიდან 2 თვის განმავლობაში. არჩევნების თარიღი დგინდება სკოლის დირექტორის მიერ ინდივიდუალური-სამართლებრივი აქტით.

მუხლი 6. მოსწავლეთა საბჭოს მუშაობის კოორდინატორის ფუნქციები

1.მოსწავლეთა საბჭოს მუშაობის კოორდინატორის მოვალეობებია:

ა) ორგანიზება გაუწიოს მოსწავლეთა საბჭოს შეხვედრებს; წინასწარ შეატყობინოს ყველა დაინტერესებულ და ჩართულ მხარეს მოსწავლეთა საბჭოს შეხვედრის ადგილი, დრო და განსახილველი საკითხი.

ბ)წარმოადგინოს მოსწავლეთა საბჭო სკოლის ორგანიზატორთან ურთიერთობაში;

დ) კანონმდებლობით დადგენილი წესით განახორციელოს სხვა უფლებამოსილებები.

მუხლი 7. მოსწავლეთა საბჭოს წევრისა და საბჭოს მუშაობის კოორდინატორის უფლებამოსილების შეწყვეტის წესი

1.მოსწავლეთა საბჭოს წევრისა და საბჭოს მუშაობის კოორდინატორისთვის უფლებამოსილების ვადამდე შეწყვეტის საფუძველია:

ა) პირადი განცხადება;

ბ) მოსწავლის სტატუსის შეჩერება/ სკოლიდან ამორიცხვა/ სწავლის დასრულება;

შპს მრავალდარგობრივი გიმნაზია იბერია

- გ) სკოლის შინაგანაწესის ან წინამდებარე დებულების წესების დარღვევა;
- დ) არასაპატიო მიზეზით 2 თვის განმავლობაში მასზე დაკისრებული მოვალეობის შეუსრულებლობა;
- ე) სასამართლოს მიერ ქმედუუნაროდ, გარდაცვლილად ან უგზოუკვლოდ დაკარგულად გამოცხადება;
- ვ) სხვა ობიექტური გარემოება.

2. მოსწავლეთა საბჭოს წევრთა და საბჭოს მუშაობის კოორდინატორის უფლებამოსილების ვადამდე შეწყვეტის შემთხვევაში, შესაბამისი კლასის მოსწავლეები მოსწავლეთა საბჭოში ირჩევენ სხვა წარმომადგენელს, ხოლო მოსწავლეთა საბჭოს წევრები დარჩენილი წევრებიდან- კოორდინატორს დარჩენილი უფლებამოსილების ვადით.

მუხლი 8. მოსწავლეთა საბჭოს მუშაობის წესი და რეგლამენტი

1. მოსწავლეთა საბჭოს პირველი შეხვედრა იმართება მოსწავლეთა საბჭოს არჩევიდან 7 დღის ვადაში, ხოლო შემდგომ - მოსწავლეთა საბჭოს მუშაობის კოორდინატორის მიერ საჭიროების შემთხვევაში.
2. მოსწავლეთა საბჭოს მუშაობის კოორდინატორის არყოფნის შემთხვევაში, სხდომას წარმართავს ხმათა უმრავლესობით არჩეული პირი.
3. მოსწავლეთა საბჭოში გაერთიანებული კლასების მოსწავლეები ვალდებული არიან საკუთარი ინიციატივებისა და სურვილების შესახებ აცნობონ კლასის მოსწავლეთა საბჭოს წევრს.
4. მოსწავლეთა საბჭოს წევრი ვალდებულია კლასთან ერთად განიხილოს აღნიშნული ინიციატივა ან დასაბუთებულად და არგუმენტირებულად უარი უთხრას ინიციატივის განხილვაზე.
5. კლასში განხილვისა და შეთანხმების შემდგომ მოსწავლეთა საბჭოს წევრი გადაწყვეტილების /ინიციატივის შესახებ აცნობებს სკოლის ორგანიზატორს.
6. საჭიროების შემთხვევაში, სკოლის ორგანიზატორი ურჩევს ინიციატივის ავტორს საკითხი განიხილოს მოსწავლეთა საბჭოზე და ისე წარმოადგინოს სკოლის წინაშე.
7. სკოლის ორგანიზატორი უფლებამოსილია, წარმოდგენილი ინიციატივა მოსწავლეთა საბჭოზე განხილვი ს გარეშე წარადგინოს სკოლის დირექტორთან.

მუხლი 9. დებულების დამტკიცება და ცვლილებების შეტანა

1. მოსწავლეთა საბჭოს დებულებას ამტკიცებს სკოლის დირექტორი.
2. დებულებაში ცვლილებებისა და დამატებების შეტანის უფლებამოსილება აქვს სკოლის დირექტორს, ცვლილებებისა და დამატების შეტანის ინიციატორი შესაძლებელია იყოს მოსწავლეთა საბჭოც.